

# TOUR SANT-MARTIN.



Hep dale , gant grāç Doue  
 Ha sicour ar charite ,  
 E vo güelet eun Tour nevez  
 O tecori Montroulez.

A bep tu , pa antreor ,  
 Tour Sant-Martin a velor ;  
 Ar galon varzu Doue  
 En em zavo marteze.

Rac perac an oll touriou  
 Savet var an Ilisou ?  
 Evit ober demp sònjal  
 En Doue hac er bed all.

Ar güel c'hoas eus an touriou  
 A excit hor sperejou  
 Da zònjal er Sacramant ,  
 En Jesus eno presant.

En adori a galon ,  
Ha goulen outan pardon ,  
Cetu aze eun effet  
Eus an touriou beniguet.

Pell a zo e tezire  
Person mad ar barros-se  
Ellout tenna e gleyer  
Eus a eur plac qen dister.

Mes allas ! calz dispignou  
Zo en pern ar parossiou :  
N'eller qet dabord ober  
Qement tra a zezirer.

Ret ê commanç da guenta  
An œuvrou necessera ,  
Pourvei da ezomou  
Ar paour , an eneou.

En qerz an ouvrierien ,  
En sêzon ar yenien ,  
Calz a zo bet dispignet  
En labouriou ar vêret.

Ar Mission , goude ze ,  
A zo coustet calz ive ;

Mes Doue ra vo meulet  
Da vea e beniguet.

Calz a bec'herien neuze  
Zo distroet ouz Doue,  
O deus santet o c'halon  
Leun a gonsolation.

Me a garfe o güelet  
D'o Doue fidel bepret,  
Evit ma ellint eun de  
Mont oll da c'hloar an êe.

Goude calz a œuvrou-mad  
E velomp o c'huellat  
An tour-ze qen deziret  
Gant an oll habitantet.

A paour a pinvidic,  
Darn calz, darn eun nebeudic,  
Oll o deus contribuet  
D'sar pez zo dija savet.

Ar rest a velimp ive,  
Me a esper, hep dale;  
Neuze mil ha mil bennos  
D'ar Pastor ha d'e barros.

Var an Tour, pa vo êchu,  
Sellit neuze a bep tu :  
Ho lagad a vo joaüs  
O contempli Mam Jesus.

Rac eno e vo placet  
Imach e Vam beniguet :  
He galloud a zistroyo  
Ar maleur divar ar vrô.

Beniguet ra vo an heur  
M'hor bezo oll ar boneur  
Da velet Tour Sant-Martin  
Peur-achuet alafin.

Deomp c'hoas a galon vad  
Da gass eun offranc benac,  
Evit m'hor bo oll ar joa  
D'er güelet cren en e za.

Meurs 1853.

